

見山園存草卷之四

河東周訓成方更父著

蠹魚傳



蠹魚者名蟬書城人也體弱善伏好羣居而嚙其先
世有曰鬼者與蒼頡同時頡造字鬼害其能夜哭因
聚族謀欲除之適女媧氏煉補天石未就雲漢決而
下流遂漂其族化爲魚湯之時天下大旱魚子復爲
蝗食禾稼湯禱于桑林而驅之或集于木竅木處中

其名為蠹或伏壁復爲魚形而小因名壁魚或因其色名白魚惟入人篋笥書帙者則兼稱蠹魚云初鬼之族不盡漂散處四方在上蔡者爲李氏其裔子名斯者最與書相習而仇益甚聞秦昭王之相祿嘗盛稱五帝三王布其書關中韓公子非亦入關頗著書其徒皆好稱引古文不置口斯恨之曰欲除六國莫如兵欲除六書莫如火非秦之強不足以成吾事遂西行游說得其柄諫逐客譖韓公子殺之相秦并六國尊秦爲皇帝然終不忘相祿所布書與韓非之徒也怒曰吾以法令佐強秦并冠帶之倫安所用古文詞若屬乃敢盛相稱許爭是古以非今無乃欲形吾短而使秦法不見重于天下乎於是立起見始皇帝請盡誅諸挾書之徒聚故六國時諸所藏詩書于咸陽雜燒之令下十日匿不以報者族斯於是大喜曰祖宗積怨此其盡復乎此時韓公子非之死久矣復得請上帝假手趙高終殺丞相斯及其子太守由至

陳涉起兵沛公西至灞上蕭何收秦圖籍書乃復行
其後魯壁得詩書春秋魏安僖王墓得竹書伏生者
年九十尚能口授尚書卜商申公之屬所著詩序傳
與諸家春秋皆續出蓋除書之令之必不能行也如
此然李斯父子死而不忘其仇乃見其鬼祖謀所以
復之鬼祖曰嗟乎冤哉殺也初作難自蒼頡暴起中
書自管城子橫被天下能以版行自楮先生千年之
間日以寢盛自生民以來未有縱橫若是之甚也是
誠不可以力爭吾聞孟嘗君之客能入人秘笥竊其
裘今效其法而變其所爲入諸藏書之所嚙食之卽
不能盡籍然斷簡缺其文不愈於聽其盛行無忌乎
因遣蠹魚舉族以行戒之曰石渠之閣盛其縹緗口
延秦火毀自一方無聲無臭弱以謀強自是南陔白
華由庚遂以絕其他古文或絕或缺亡天下不復有
全書諸治古文者察其跡爭欲得之甘心焉其族繁
顧不可勝誅也則筮之兆曰有椒其香于頡有光於

見山園存草 卷之四 三
是以椒沃篋蠹魚卽奪氣以死間有詣中書上其事者遂定椒壁之制故壁魚亦爲之不振云

太史公曰李斯火諸書蠹魚復居中食之身旣伏誅子孫亦爲人所撲滅天之報除書之令何如哉雖斯有別子不盡誅然冒他姓散爲椽隸敢于增減文書漢魏以來已苦之其與蝕木之蠹同稱而見惡于天下焉宐矣或言蠹魚之化爲脈望乃通于仙何其不經乎

蕩平奈學宮之廢而不建固已七年矣康熙壬戌太守江臯至始撤廢寺爲殿以妥神其于規制未備也又二年甲子余以分巡右江受敕治柳釋奠于瓦礫起而視其不垣不門齋廡不設明倫無堂是有孔子而尚無七十子之徒師儒尚無相見之所也其結茅相望維兵之廬交道四出豕牢與毬塲分埒又安在其爲妥神也余故亟欲修建而詘于力又不可以謀于僅能餬口之有司惟有踰年積俸盡付教諭蘇敷

霽使之考制辟土鳩工庀材余則間日一省焉維時
大計屆期余又奉檄入桂與藩臬可否所屬之羣吏
因代臬篆弗歸而蘇乃歿復以委訓導何鈴先植其
楹乃鬻其壁泮池戟門上下具舉凡陶之事若干萬
木之事若干千工匠之事若干力役皆平賃不問縣
官經始于秋八月落成于冬十月該學旣報竣遂請
記之余維四海銷兵皇帝幸闕里親祀大牢臣工仰
承德意崇修杏壇雖大荒烟瘴如柳州亦得舉墜緒
向風設教所屬諸人士從此家絃戶誦上遵昌明聖
學之旨下踐其鄉先生服習之常行將矜狼狽殫盡
革其心四民分業禮樂乃張庶幾天子釋南顧之憂
余小臣可告無咎于地方則所厚望于此舉者也若
徒曰余與子厚同鄉里故以此振其遺風焉則未矣

重修藥王廟記

負東城爲廟祀唐孫真人曰藥王由來遠矣城善圯廟以歲損里之人規濶狹半城之厚自下斃之達巔遂易材新其廟直廟西駕道揭兩楹而三通焉工起訖有年矣歲甲寅始請余爲之記欲彰善也示不忘也余曰宜哉夫人捐已私以急于公善事也雖一木一石更歷年歲而終有不可忘然君子之所謂善顧惟是一木一石之不私云爾乎夫以天道好生人情

畏禍復得若神操方藥以調劑其間宜乎天之好無不遂人之畏無不免矣何乃呼籲時聞呻吟難起耳目之前天扎往往而有則知神之于人祐其可祐不祐其不可祐而人之于疾也第當慎之而不在于祈禱今且有人焉飲食服物之細倫常名節之大無往不謹以自立于無咎以自遠于憂患或不幸災沴偶逢則鬼神必將呵護之不遑豈俟禱之而後救哉若其身心不攝自近危亡顧乃亟呼於神曰救之救之吾恐博碩以將難存許國工巧在望莫拯晉君非神之不慈向也久切震怒而至此適當其罰祝禱雖工竟亦置若罔聞耳然則人之入是廟者將爲神之可祐者乎抑爲其震怒者乎返已近思而君子之所謂善者可知矣

侍御史齊公德政記

夫有文章爾雅慷慨以天下爲己任義形于色及乎受命出使四方顧莫能慰雲霓拯水火其孰與恂謹寡言上不辱命下濟於時之爲賢乎哉諺曰時平難見德際變易爲功往者世祖朝侍御史畿輔劉公山左焦公與今上康熙初長山李公雲間施公相繼持斧下三河深仁厚澤視昔滇南楊公之三十大事不相減然當時天下無事民歌順則而已歲甲寅而後

見山園存草 卷之四 九
閩越秦楚傳烽數千里禁旅四出三河之民旦夕數
驚商估不前方是時侍御齊公靜以鎮之休以養之
使民各保其業權政因之不墜逮及期將代商若民
遂欲鐫峴山之石以誌不朽吾聞之曰宐哉侍御史
之以年而代昔也於境今則於署代於境者先時而
發猶得挽留之以遲其行代於署則卽日而駕非先
期勒銘何以彰德雖君子之善不勝窮下之感悅不
一詞舉大端示不忘召南之棠咏以短章斯可矣 益

匝澥池百二十里築隄防連墩舖有若斥堠然往時
使者巡視儀衛甚設有司供奉必越數日乃罷公單
騎一日周之州邑令長不來也河東商無蓄積每稱
貸納課而歸其息公命先掣支後封納下戶率均其
利焉課額若干萬例以仲秋畢其輸侍御十月代任
每預征次歲之課公獨謂其不可戶部歲頒引目商
人領之旣勞且費公親爲攜至無所責也柏臺供應
寡節公曰安有爲天子使臣乃以日用費民者爲減

其十之七禮立春之日迎諸東郊後世踵事侈靡至結綺於車或爲虎豹飾張樂其中過堂而酒歌焉公曰天豈以不迎不春也罷之先是侍御巡按三藩其居河東僅六七閱月耳自巡視例停周歲一署因而田獵宴會日尋焉公曰介馬馳涇渭商於太白塵相接人臣無廓清之功尚事宴樂焉忍乎惟中夜躬察城守不倦也西陲之不守額引懸焉鳳課虧焉及大兵恢復其地初出民于湯火公不欲以稅額重困之

又不欲折朝廷之課出已力取盈數復不以捐助爲功名尤爲人之所難也蓋公之約已惠物內恕而外無所擾有如此吾聞閣臣圖公出爲大將軍不戰而平關隴公則以不擾治河東天下多事惟安靜可以保全公益以圖公之道行之者今上方不次用人行且擢公爲輔弼大臣與長山雲間諸君子同列鹽梅重地繼此有冠鐵柱下河東者必悉心告之使踵行善政焉則可以世世沾德矣

簡香堂記

郇城東北隅有古木數十章臺榭錯起其間者張中
丘公念石先生之柏園也自公先人行唐公朝夕其
中登嘉靖甲子賢書公總角受經於堂卽曰吾他日
當易此更大之後宗人多故經售他族天啓甲子歲
公以入闈之夕夢行唐公授彩筆堂上指授若生平
公遂獲聽鹿鳴而園乃復見還維時長公萬青生纔
數齡公卽課讀堂中與行唐公授經時不異也崇禎

甲戌公既筮仕萬青爲博士弟子員年少發聞爲柏園社萃士講藝無虛日比公謝政歸時省業堂上喜曰吾家三世無他嗜好惟於此傳經不墜香以簡延惟家之光遂以簡香顏其上而命萬青結社日益廣前此先君子與公爲莫逆交常於此倡和焉至是某居甥室亦遵公命與萬青同事其中七寒暑癸未之亂謂必有毀圯憂乃更歷兵燹至數年未嘗有損及簡香堂薪木者皇清建元以乙酉比士於鄉萬青入彀丙戌遂捷春官某亦以是秋與鄉薦則此堂之爲光于公固已一再傳而覃慶某家亦久矣長公之鳴琴渭上未幾解組渡河東還鼎新之將酬公當日意惟是興懷山水足跡久滯吳越間某亦荷命讀中秘書分司銓政竹牕風雨聲彼此不聞者二十年公復延先君子登堂舉酒相屬和如少年時乙巳冬某以讀禮西下公方課諸孫如向之所以課長公萬青者某往謁諸堂則感慨係之矣歲巳酉公春秋八十有

身山園存草 卷之四
二猶念後先發跡地間日一往加髮望焉命某爲之
記某憶其始興及茲百二十餘歲於中發祥自行唐
公柱石始中丘公念石先生繼之暨長公渭陽令萬
青三世其會業於茲登甲乙科者十餘人或宦四方
或居林下舉皆稱斯堂不置口然人事三十年而復
必當有聞孫繼起更爲簡香堂之光者公蓋日夜望
之矣

遷葬外祖柱石李公記

嗚呼此明肥城縣二尹李公改遷之墓也公諱奇才
字柱石爲通政卿尚文先生嫡派剛介好學祖孫相
方而公又善於教由其門以仕進者相望公乃以明
經起家非其志也以此怏怏不自得而卒於官一子
大本方在抱元配馮先公歿繼配王爲未亡人者五
十有六年以康熙十四年乙卯冬十二月亡先是公
與元配合葬東郊外孫某謂其地當孔道不宜且冢

嗣罹禍孤孫失明公之世德豈宜此咎念乃地之不
善致然顧可憚於更卜乎余前順治中直城北羊馱
寺購此地而善用擇康熙丙辰春三月之吉以禮遷
葬公二配祔之外孫壻貢生路某議勒石以垂不朽
爰表其畧如此獨所深感者吾母馮出也馮孺人不
及見吾母之有家如吾母不及見子之有室也今以
念母之故重念外家奈何門祚衰微墳墓傾圯舅氏
歿于兵變遺腹子維周漂泊秦中而又智其日幸感
祖母貞德從子孝廉人式贖之歸成立抱子孝廉復
泯泯以歿祖母又亡向之同謀門戶者至此虛無人
母家之存如線尚溯外祖爰及銀臺史遷所云天之
報施善人何如者卽吾能無致疑乎所賴羊馱寺之
封於茲方起吾母太宜人箕山之壠時亦更遷其或
邀天庥獲地力子姓振振復且著望河東若裴若王
若薛柳蓋亦事理之可冀者其何日哉其何日哉

粵遊記畧前

甲子春予受右江之命以夏五月望後出都時暑甚
載渴至涿鹿慶遠康同知有德以入京來謁具言粵
西是夜雨旦立城門中久之乃發仍避田家茅亭下
三遷水輒至平地深尺稍前遂至沒人膝易長人定
興求高阡以行其從水中行者幾至沒馬前渡滹沱
河仍雨出邯鄲始見日訪項羽破秦軍處于鉅鹿魯
太守僖故交也言之如目睹南至衛輝田使君以方

藥見問其所屬清化鎮泉香竹影勤數十年夢想以
夜行視爲兩壁夾道旦而回首如蔽山十里何史稱
太行天下之脊也登之或數十里無土石罅中立孤
木無蔭可息行者揮汗烈日欲杯水自潤不可得星
軺驛西雨解渴塵然山行上下忽欲扳天忽欲入谷
及陽城境則高滑益甚輿人不戒頭破于石臨河望
前岍殊無行跡謂尚有別逕在不知渡後以八人舉
吾輿卽緣其岍以登邊高邊下水聲逼人欲墜也折
而西其道若鯽魚之腹中窄旁高而仰其前於此承
雨以泥步步登天久之得一村曰北孔寨飯麥仁一
器風雨轉加遂擇一樓以宿焉是夜與從者相失次
日渡水十三復睹于蒿峪之口遂入沁水李令見歛
辭之御風再行二十里宿王寨四山如環夜不知暑
晨出則草木藏山不欲行人盡見之草盡石出東塢
如削其風鞭衣雖易葛猶有寒色地氣之奪天時也
至于此西塢而下依然締綌又有所謂夫妻嶺者俯

而下以四人當車旁四人挽之度後人之足在前人之頂車中以身向後如仰卧兩手扼車如挽弓一磴側轉若將覆焉前至翼古晉都也與曲沃相望少師衛夫子之居在焉音容一隔遂成懷葛一茶居停而去之再宿遂至家親友問暑畢出穉子揖客閱十有四日鄉鄰之禮尚多缺畧惟初歸卽訪運長見辭以疾及將行之前一日乃見過曰不知公行之速也

粵遊記畧後

秋七月一日南發次原上王生館詰朝渡河宿磁中再宿百伏夜經熊耳山不見光武所堆甲惟草木颺風蒼石臥虎使人有遺矢者爲具白陝州以防患也有韓城鎮烟火萬家其坊稱爲留侯故里云汝上無條以速去爲幸惟故邨令李公貞佐有愛于民又殉難立臣節邨人廟祀之余少識其人能無留連廟下乎許昌徐刺史以役迎且晤言久之其輿人皆捷如

奔馬豈猶有魏武健步耶臨穎梁令潢良吏也察其四境若未罹兵革其他州邑則荒烟彌望草竊古田因知周人歌離黍其土辟其戶口猶存也確山有暴客余友項韋菴使信陽欲與計所以彌之值其出乃與老僧閒話遂不寐取道南行驛騎竊語曰往有擐甲者夜自南來前後列炬虎輒自中取之何公此行之冒險乎余微聞不問行四十里叩野人家一飯天乃曙遂出所謂恨這關者以入楚應山任令假以館次至德安傅太守語古今成敗甚具行復察山川訪其故舊以孝感黃陂爲兩雄爭勝云但詣黃之日如履火損執鞭一人邑令盛儀鼓吹相導遍其城復送出城外一小館門若容車屋若容榻熱劇呼水以浴體旣適則心馳黃鶴樓上是故以夜分速駕焉至則宮使君假樓船緣大別山南湖以十餘人絳之日不能一舍篷下斜日不雨敞一葛揮汗以成之旣而風利旦夕三百里望其枕巴陵冠山飛起秋水揚波于

下者岳陽樓也余遂維舟其側夜當水天月影中耳目浮動因喜子瞻羽化登仙之語未爲欺我客乃有以夜色蒼茫爲言者余曰假使十日竝出晝夜不分得無煩吾子彎弓以射耶因大笑舉酌久之乃寐比曉渡洞庭舟人曰湖非風不渡風急則浪又猛幸矣今茲之利吾帆而不波因倚楫隨余所指以報曰巴陵北王師列陣處也徬華容者雲夢澤值帆前者李市山也又稱君山勝槩不絕口俄而湖水漸斂綠茵爲際則又曰此所謂青草湖者也出湖爲湘水是夜違湘陰十里而泊焉訪汨羅江一弔乃入長沙聞其中尚有賈生宅對岼嶽麓山爲鄒浩棲身地故又曰道鄉臺云自是湘水波澄石灘爭出非巨艦所行也趙使君見給輕舟七日而遇譚太守觴中秋于衡嶽之下矣入永州則尤喜其山色可餐水綠如染每值山交不知舟自何出旣出山復如前中流回顧又不能辨吾葦所自入其觀音灘上下厲石激回波駕舟

湊石以轉頗爲所拒人聲與水相亂其山則如羣立以望人之駕舟者古閣起峰頭舟中見之又患掘衣不早也旣至則千山斂聚一欄日影雲章無屑赭聖余爲四顧不忍去然渴甚火者不能具茶以故返縱權祁陽邑令方夜飲流水如答其鼓聲焉次日至零陵王令登舟言鈷鉬潭與元次山遺跡最悉以余之復欲陸行也又以良馬二送至全州方未至全之數十里山勢嵯峨雲樹相接似天之秘此佳勝以爲遠行生色者全亦楚地也改入粵西每鄉薦常居其半州刺史鄭言如此余曰松風山色古翠及今加以鄉鄰綠水行旅青雲何怪其然乎南抵興安秦之連城以防越者也湘灘水出焉桂林同知時攝篆能執禮問海陽山水源與龍蟠山四足魚曰此鱗絕矣泉以時發余謂其春水吐山一源兩派萬峯卓立于上各藏洞穴行人自白雲中穿出二十步卽不能相見也何三十六陡之足畏乎靈川至桂林五十里度其山

見山園有草 卷之四
巔不及始安之草根然居城于山亦居山于城居家
于雲亦居雲于家余喜甚因遣七千里勞塵隨風散
去此八月晦日也月吉上官踰三日雨中謁先聖廟
禮既舉矣遂下龍城

處士護君衛公墓誌銘

衛公諱王室字護君系出翼城白馬村自曾大父江
遷居運城歷祖得春至父民庶公以是非不苟鄉里
推爲司直舉丈夫子二公其長也生而魁梧不輕嬉
笑少業儒不就棄之建猗頓策以起家性至孝嘗質
遷遠歸悉其橐奉親毫髮無所私父性剛嚴與母或
相左則和顏幾諫務得其歡心然後止諸叔父弱不
自立公俱奉養不失缺歲庚辰歉甚食指頗繁舉能

保全無蕩析憂乙酉父母相繼亡泣血骨立葬之必
如禮比家道雖益豐恒不敢美其衣食曰吾父母以
菽布終吾何忍獨用此歲時詣墳墓必躬灑掃數十
年未嘗少替也弟王國任蜀遵義鎮標中營守備其
行也公執手言曰大丈夫受天子命出任邊疆當嚴
紀律立功業勿復顧家爲也及弟以視歸公慟之旣
而指柩語其子曰汝叔父勤勞王事雖歿猶榮汝輩
當追效其志徒作兒女子泣何爲乎公好施賑人之
危周人之急屢矣嘗出五百金購藥餌延醫處方遠
近病者恣取之賴以全活甚衆其尤所難及者女弟
歸孝廉王公价早世委女弟暨三幼子于公於時內
外侵侮無虛日公未嘗少有引避卒爲經營之王氏
之業不墜又延師考課諸子俾獲成立至其弟之亡
亦遺襁褓子二公皆愛育如已出十餘年如一日易
簣之日若子若姪若女弟之子視一周徐曰吾少也
貧中更亂離今幸天下無事衰老無所表見以歿若

曹勉之各當爲天下才勿區區牖下以終也語訖遂卒公生於明某年某月某日申時卒於清某年某月某日巳時壽六十有三原配祁氏再配路氏子二女二孫一曾孫一銘日子以丑卯以酉山則不溢石不朽晏然中處天地久子子孫孫勿替其守

磔鼠令

惟汝耗竊之虫有皮有體據我倉廩爲穴無日無天損人之成功旣無家而不破縱已之利口尚何物之能完自其南國穿墉訟成乎室女以至東方食角禮缺于邦君上下同虧其奈欲投而忌器朝昏莫保何容慣汝以三年雖首陽之無所適歸且窺其採蕨在於陵之僅存聞見亦羨其餘螯吁嗟乎事旣殊于飲河終難滿腹時不容於去汝莫可棲身與其熏諸邠

風待時舉火豈若磔以漢法一旦甘心之爲快乎哉
利用軍中之掘休令銜尾以渡江奸雖人立而啼莫
追屠腸之重典庶乎一以警百颺颺皆驚因而忍可
成恩黍苗無恙此固人情所共願而于王法爲允明
者也特榜通衢以昭炯鑒

招撫逃亡令

爲太平無失所之民流落有應還之日亟與招徠共
歸樂土事照得吳頭楚尾水濶山高風尚清淳民無
厚蓄彘緣閩越流氛致有烽烟數歲兵旣結而餉遂
增餽已塵而吏尚怒初亦不甘于遠竄旣而事出于
千辛但取偷生違言保業及其流離旣久苦于衣食
多艱轉念歸期復愁索逋此所以目斷流鴻而心灰
故里者也今者深悉此痛嘉與維新凡爾脫籍皆我

編氓始緣逼迫而逃原非得已今奉招徠而返豈不
爲歡莫言到處爲家終是故鄉可戀別已久而重歸
相逢如夢經多艱而再聚食荼成甘若恐地方再擾
仍不免於奔亡當念天心厭亂已全歸於底定劍閣
一鼓而平況此黃茅之嶺滇池三驅而靜何言錦水
之濱鳳闕之雲霓不遠法約三章虎臣之旗鼓更新
凱旋六詔誰復輟隴上之耕當共受王明之福試念
幾年流散婦子難免秋饑寒若能一旦來歸隣里仍

通其水火田闢而食可飽燈明而枕可安與其斷蓬
無定豈如集澤爲歡卽或曾經迫脅一朝騎馬皆須
痛洗前非此日投戈雖復故閭蕩盡念已歸無可歸
亦當就近投名求其樂能永樂倘狃於望屋而食不
肯回顏應計其無地可棲終難着脚抱虎狼以終日
豈可爲常保稼穡而安居永言無禍至若歸來之日
一例登收諸凡積怨之家不容修報凜凜冰霜從茲
消盡昭昭天日自可同觀我不食言爾勿多懼

申飭官方令

照得粵西土曠人稀山多賦少況經兵革之餘草下零星四五戶雖在城垣之內風前寥落兩三家湫斯土者能無以烟瘴驚心撫斯民者豈忍于虎狼嚼骨苟王曾無溫飽之志何須多所誅求雖弘羊爲掎克之臣到此亦當改過彼荒途之劫掠頻聞豈其在官而亦劫在稽古則循良是慕奈何出政之無良故不得藉口于百孔千瘡乃陰欲染指于火耗常例止知

已所應得不念民之萬難豈爲民父母之理乎哉本道奉敕而來首先察吏今者下車伊始務在寧民牧民豈得虐民且漫擊升堂之鼓貪吏何如廉吏可輕收暮夜之金況朝廷之功令森嚴誰容假借在制節之激揚痛切爾莫輕嘗苟爲碩鼠我聞而卽以上聞如有甘棠民愛則無不共愛從此有陞有降兩路相分以及爲貶爲褒一言立判惟有清廉可尚而非情面可干慎之慎之勿貽後悔

禁止厚息令

照得粵西地瘠民貧捉襟露肘雖柳江可飲誰成無米之炊况鷺嶺難烹空對生塵之甌每任土而賦稅不完因有求于私室縱傾家而瘡瘍猶在徒自顧以驚心方其稱貸于人望門則難于出口旣而追呼在戶聞聲則苦其不堪在有力之家旣利其急而厚其息當期滿之日必據其券而速其償巧于權子母加而又加稍爲寬日時契而又契卒至多端逼索明見

其賣妻鬻子揮淚以隨人或復詬詈難甘遂至於弟
北兄南離鄉而逃債是民之貧者益貧去者終去皆
由稱借之多利息之重也合行嚴禁爲此示知有無
相通原爲古今之義違禁取利實乃憲典所嚴借債
者惟照例而按月三分營求者莫違法而一年數倍
敢有重取決不輕饒其有負義忘恩抗債不償者不
在此例

亟行獎勸令

照得褒節義舉善良所以風示四方用廣德化甚盛
典也此其奉有部行已久矣各直省諮訪題行不一
其人惟右江三郡無聞焉豈其性行不善歟抑有其
人而推獎不及歟何以泯泯不彰也夫十室有忠信
幅幘千里謂無一人可舉何其菲薄吾民也昔者余
行甫張忠簡之表于朝鄭守聰王乘龍之孝于家鄒
女之賢蟠龍岡之隱已旣彰彰史乘矣謂一邑有之

其他則否昔人有之于今則否豈爲篤論乎各府縣講約相聞矣顧寥寥無所舉是徒托空言而不務實行也何善政之有夫望隆一郡德重一鄉者固當詳請題旌矣其他德不必求全一節一行知無不舉人不必皆漢或徭或獯美亦兼收惟期有善必登因以勸後庶幾丕變風俗不負本道優崇期望之心也

了一西歸疏引

輪回超度之說果驗乎歷古及今將無有百十其身者福田利益數爲修種則後世困苦宜減古十之八九水旱兵疫顧乃視昔爲烈何哉漢明以前佛法未入蕭梁而後資薦方聞由茲上遡將數千萬年陰風慘聒與人并擠乃今日月下不聞共工氏鼓行以出此宣何法哉夫天下惟情爲難割耳吾嘗率意相索千百世之人頓逢几案諸嘗與同言笑心復關切者

尤依依耳目不可滅顧以不能冀其在生之樂悵焉
悲嘆庶幾寒魂冷魄不墮惡趣卽亦不能不代爲停
致而事之驗與不驗弗計也且物形旣化則彼此無
分其氣之合并爲一緣感復結不及從混沌中擇美
以居此又爲今世之大恐釋了一曰消解嗔癡回見
本性資之生清靜之域惟佛力爲能然郇瑕氏之墟
我與釋同生長地也已丑之變殺戮到鷄狗其欲振
錫唱經度之蓮花座下十有餘年矣今年秋遂決意
一往余因之告里中曰聞死之痛不如自睹之甚也
沙門之情不如居室之深也乃持鉢走二千里爲其
先人說法推及諸不幸之族有如了一其諸親戚故
舊昔曾聞號呼見決裂者夢裏姻親猶爲飲泣眼前
草木尚在傷心顧乃惜涓滴不以潤渴望旛幢反爲
閉戶空王意熱而烟火心灰有是理乎哉了一祖居
與見齋先生講學地爲最近若謁講席然後說法吾
又安知了一此行不憊然爲今之彞之也